

# Vizyon

## Lavi i tro ser dan Sesel!

**S**eselwa pe soufer dan son paradi. Pri lavi in ogmante, lenflasyon in depas 17%, elektrisite ek delo in monte, benzin ek dyezel in vin en fardo e gas kwi manze pre pou pa kapab touse e nou pep pe vin pli pov. Sa i realite ki nou pep pe fer fas avek. Malerezman pour nou zabitan, bann dirizan SPPF dan nou pei i refize war sa soufrans ki lepep pe pas ladan. Zot kontinyen viv dan zot lopilans tandi ki dimoun i soufer san konnen ki mannyer pou fer sa de bout zwenn e fer fas avek difikilite lavi.

### Logmantasyon dan komodite

En keksoz ki kler se lefe ki gouvènmman i refize partisip dan okenn program pou ede soulaz nou pep, spesyalman bann ki pli feb e pli vilnerab. Ki mannyer eski en gouvènmman ki enn son lakonpanni ki enport diri i kapab les diri ki mazorite dimoun i servi ogmant par R3.50? Eski sa pa montre nou ki vremen SPPF nepli enterese avek lepep Seselwa, me plito avek zot pos? Ki mannyer eski sa menm lakonpannyen i kapab pa prevwar lenportasyon lafarin e les prodiksyon dipen ariv lo nivo kriz avek Seselwa pe fer lalinny dipen avan ki i deside fer keksoz serye pou ganny lafarin? Sa ankor enn fwa, pa serye, e lepep Seselwa i note sa bann negligans ki pa akseptab.

### Oli logmantasyon lapey travayer?

Dan milye tou sa soufrans, travayer pe kontinyen demande oli sa logmantasyon lapey ki Minis Finans ti anonse lannen pase. Ti sipoze annan eksper pou etidye sa sitiasyon e gouvènmman ti fer promes ki dimoun ti pou ganny en logmantasyon lapey. Akoz ki SPPF nepli koz lo sa size? Annou pa oubliye ki SPPF dan Lasanble, atraver Mrs. Potter ti osi dir ki tou 'Carers' ti pou ganny en logmantasyon lapey. Akoz ziska prezan tou keksoz i ankor parey e sa bann dimoun pe ganny trete koman bann ki'n ganny oubliye par sa menm gouvènmman SPPF?

### Plis Devaliasyon ankor

Ozordi Sesel pe pas dan en sel dezord. Avek en lekonomi ki pe kontinyen deteryore, nou osi aprann ki byento roupi pe al ganny devalye ankor. En dolar dan labank i sipoze ariz R10, ki vedir sa pti \$400 pour bann ki pe vwayaze poubyento ariv R4000. E pourtan Jj ti promet pou met dolar dan pos Seselwa, e menm ogmant lakantite ki dimoun i gannyen. Avek devaliasyon pri lavi pou ogmant pli ankor. Me sa ki malere dan tou sala, se lefe ki nou pa antann gouvènmman vin donn lepep okenn lankourazman pour lavenir. Zot pa serye!

### Lavenir i avek SNP

Pep Seselwa, lavenir pour nou pei i avek SNP. SNP i enterese avek tou dimoun. SNP pou kas sa sistenm kot ozordi serten pe byen pase tandi ki mazorite lepep Seselwa pe soufer. Anba SNP lalwa pou aplik pour tou dimoun, e nou pou protez bann ki pli vilnerab. Nou pep pe soufer, e la konmela nou pa war SPPF ditou devan nou laport. Me selman letan eleksyon, zot pou esey vin aste nou vot. Napa lavenir avek SPPF. Ozordi dan Sesel i annan zis SNP ki pe debout lo kote malere dan zot soufrans. Kouraz tou Seselwa!

## Laviktwar pour Ferrari ek SNP

**L**e 19 Zilyet 2008, zabitan Mont Fleuri ti anvoy en mesaz tre kler pour Mr. René ek SPPF an zeneral: **Zabitan in determinen e se Mr. Jean-François Ferrari ki Mont Fleuri i anvi koman zot reprezantan dan Lasanble Nasyonnale. Malgre tou bann lesey pou fer dimoun per atraver bann menas, plis ki 700 dimoun ti desann e vote. SPPF ti kwar ki zis 200 dimoun ki ti pou annan sa kouraz al vote.**

Laviktwar Mr. Ferrari dan Mt. Fleuri i enportan pour lademokrasi e i reprezant en gran vot konfyans ki Seselwa i annan dan SNP koman parti politik ki pou form prosen gouvènmman dan Sesel. Sa i donn en gran lankourazman tou bann dirizan, aktivis ek siporter SNP. I osi montre ki travay ki nou pe fer i ganny rekonnet par tou dimoun.

Lentimidasyon SPPF ti komans depi byen gran maten. Olye reste se zot e dormi, oubyen al anvil pou fer shopping parey zot sef ti'n dir zot, bann aktivis SPPF ti lo semen pe gete lekel ki pe al vote e menm pou ensilte serten dimoun. Zot ti vin ziska dan lakour lekol pre avek stasyon vote. Gard ti bezwen entervenir

e fer zot ale. Nou portre i montre lapolis pe demann enn sa bann dimoun pou sorti.

I kler pour tou dimoun ki zabitan Mt. Fleuri i anvi en dimoun ki koze e ki kapab met zot konsern devan. Mr. Ferrari i en dimoun ki debout lo kote laliberte lekspresyon ek demokrasi. Sa vot konfyans ki in gannyen pou permet li kontinny sa travay avek plis lafors. Nou felisit li pour sa gran laviktwar kont tou bann lafors ki ti opoz li.

SNP pou kontinyen travay pour lepep Seselwa. Mont Fleuri i ver, e nou pou tenir nou paviyon byen for e byen o. Konmdir Dede, 'Si pa Jean-François, lekel?'



# SPPF i kontinyen vann Sesel

**I**kler pour tou dimoun ki pe swiv tre pre sa ki pe arive dan Sesel ki SPPF pe kontinyen vann nou pei avek bann etranze. Tou benefis i al pour sa bann gran imsy e ki vin envesti isi, tandi ki Seselwa i kontinyen zis vey dan gob e manz bann pti lakrout ki tonm anba lata. SNP ek lepep Seselwa i dir ki fodre ki SPPF i aret vann nou pei.

Napa moman ki ou pa tande ki en lot zoli bout nou pei in ganny vann avek en etranze pou fer en lotel. Letan sa i arive, i vedit en lot zoli lans dan Sesel ki ganny rezerve zis pour etranze e Seselwa pou napa akse.

Sa bann etranze pe ganny tou kalite konsesyon ziska gard en gran poursantaz foreks ki zot gannyen. Zot fer larzan dan Sesel, me selman zot larzan pa pas dan nou labank pour

tou Seselwa benefisy e. Eski sa i normal? Eski sa i montre nou klerman ki sa bann dimoun pe zis servi nou zoli pei pour zot fer zot ta larzan, me ki zot pa vreman enterese avek nou Seselwa?

I drol ki ziska prezan Mr. Michel ek son gouvrenman pankor kapab pran en desizyon pou ensiste ki tou envestiser i met zot larzan dan nou labank pou nobou ed nou lekonomi. I osi drol ki ziska prezan sa bann dirizan pankor konpran ki Sesel pe senpleman ganny servi koman en landrwa lanmizman e fer larzan pour sa bann boug ris. Ziska kan eski Seselwa pou kapab kontinyen zis manz pikan ki sa bann gran imsy e zet anba lata?

Byento Seselwa pou dir orevwar avek Beau Vallon, Port Launay, Cap Ternay, Anse La Mouche, etc... Eski sa i akseptab? Seselwa i

dir ki nou pei i apel pour nou, e si sa bann gran imsy e i anvi vin Sesel fodre ki nou pas an-premye e ganny sa ki nou merite dan devlopman nou pei. Sa ki pe arive ozordi pa akseptab.

Sa ki vreman fer nou dir ki nou ganny zis pikan, se parski sa bann gran lotel i anmenn preski tou zot staff sorti deor. Seselwa i ganny plas netway lasanm, travay lo bar e lav kastrol dan lakwizin. En Seselwa ki esey debourye i ganny tou kalite lobstak e i ganny ranplase par en etranze. Sa bann etranze ki vin travay i ganny gro lapey ek lezot lavantaz tandi ki Seselwa i plito travay pour mwens.

Lepep Seselwa pa dakor avek sa ki pe arive. Nou ensiste ki Sesel i nou pei, e ki fodre nou benefisy e dan tou devlopman. Me nou osi anvi dir avek SPPF pou aret vann Sesel.

## Logmantasyon Delo ek Elektrisite ankor

**L**afarmiy Seselwa pe al eksperyans plis soufrans ankor la ki FUC in fini lanonse ki delo ek elektrisite pe al ogmante le 1 Out. Sa logmantasyon pou afekte tou farmiy Seselwa. Menm si FUC i oule esey anbet dimoun an dizan ki sa logmantasyon pou pran an konsiderasyon bann ki pli vilnerab, larealite se ki tou dimoun pou soufer, e pou annan mwens larzan pour bann farmiy fer lezot depans. Lefe ki FUC kormela i serye lo koup sa bann servis si ou pa peye, e kou rekonesyon in ariv R110, sa i vedit ki lafarmiy Seselwa i devret met li pare pou fer plis sakrifis ankor. Sanmenm sa meyer lavi anba Jj?

## Lepep in swazir SNP

**A**vek en laviktwar konvenkan dan sa eleksyon parsyel Mont Fleuri Sanmdi pase, zabitan sa distrik in montre klerman lekel parti politik zot anvi i reprezant zot lo lasenn politik ozordi e diriz travay lopoziyon.

Swa zabitan Mont Fleuri sete touzour SNP. I malere ki SPPF in taye e DP li in vin aste en lager ki pa ti pour li. Konsekans zot aksyon i tro grav pour sa parti. Avek selman 12% sipor, i kler ki DP i nepli en parti avek okenn lenfliyans lo lasenn politik Sesel.

SNP napa okenn problemm avek Parti Demokratik ki ti formen plis ki 40an pase. Ofet nou kwar ki koman de parti lopoziyon, SNP avek DP i merit pe koz menm

langaz e anmenn menm lalit pour laliberte, lademokrasi e prosperite dan Sesel. SNP i osi annan gran respe pour fondater DP Msye Mancham, ki osi premye Prezidan nou pei.

Me i malere pou dir ki en pti group mersener in 'hijack' sa parti. Depi ki Christopher Gill ti 'cross the floor' sa parti in gate. Zot latitid zis maltret SNP e fer tout sort remark derogatwar kont en lot parti lopoziyon, pe zis ede ranforsi poziyon SPPF an mezir ki zot detri zot menm.

Lepep i war sa byen e rezilta eleksyon Mont Fleuri in donn en manda konvenkan SNP pou travay pour zot e nou swete ki bann dirizan DP in ganny sa mesaz kler.

## PAS PARTOU

### Paviyon eternel i desire

Sa paviyon eternel ki pe kout Seselwa de milye rroupi zis pou pey elektrisite ki alimen avek li lanwit antye in desire avek gro divan. Petet sa i en sinny ki lanatir pe anvoy pou gouvrenman e pe dir li aret gaspiy larzan lepep lo en paviyon, me plito pou met manze dan vant Seselwa!

### SPPF ti vreman per SNP

SPPF ti vreman per SNP dan sa eleksyon Mt. Fleuri. Albert René ti dir ki i pa oule ki Mr. Ferrari i ranport demyen viktwar lo li avan ki i pran son retret

final dan politik. I ti prefere alor donn lord pou pa pran par dan eleksyon. Me malgre sa, in soufer en kantite akoz SNP in mars lo SPPF e zot konnen ki Mt. Fleuri pa pou zanmen vin rouz ankor!

### Donn en lape prezan

La ki lepep Seselwa in koze, nou espere ki Paul Chow, Frank Elizabeth ek Ralph Volcère i ava donn SNP en bon lape dan zot zournal. Nou swete ki bononm 'Cross the floor' osi i ava aret ensilte nou, e bononm leptospiroz kot Independent i ava vey son lasante e aret loke lanwit antye letan i pe rode ki gonaz i pou mete pou ranpli son paz.

## SNP Lottery

**WIN WITH THE SNP!**

**PRIZES**

- 1st : Family holiday : Four return tickets to Mauritius + 7 days accommodation on BB
- 2nd : Two return tickets to Singapore
- 3rd : Two nights HB at La Reserve Hotel, Praslin
- 4th : Two nights BB at L'Archipel Hotel, Praslin
- 5th : SR5000 cash
- 6th : SR5000 cash
- 7th : One washing machine
- 8th : One refrigerator
- 9th : One TV set
- 10th : One DVD player
- 11th : One Guitar
- 12th-20th : Consolation prizes

**R10/-**

**NO:**

**Draw on December 20, 2008**